

今覺金詩

陳曾壽題

冊上


今

卷八

金

詩





Digitized by the Internet Archive
in 2010 with funding from
York University Libraries

今
覺
盦
詩

陳
曾
壽
署
檢

太歲在上章
執徐用衍采
聚珍版排印

梅泉觀察至德右族也至德置縣始於唐楊吳時改建
德近又復唐舊稱故君爲至德人而其先德著述尙署
建德也唐咸通中君六世祖諱繇者與弟繁同成進士
仕至中丞並工詩廁咸通十哲又稱至德二周其集收
入 欽定全唐詩自唐以後代有聞人逮君祖慤愼公
起自兵間迭擁節鉞諸父多掇巍科高第家世之盛皖
南列郡無與比君幼穎異成童時已以茂才列上舍工
制舉文顧非所好獨酷嗜六書九數之學邁往深造若
有天授其於六書不蹈襲乾嘉門戶以爲段桂諸儒但
能糾元明之謬以還二徐之舊刊二徐之誤以還許君

之舊如是而已不知許君爲東漢經師去古已遠於字
義之不得其解者輒以詁經者訓之滋非朔誼道咸以
後地不愛寶山川郡國多出鼎彝而龜甲出土尤晚其
中多三代眞古文往往能正篆變之譌匡許君之失此
道至近世漸卽昌盛而君於四十年前固已爲先河之
導矣戊戌政變國論趨新君念制器尙象必稽於數因
暫置六書而專壹於疇人之術自周髀九章李冶郭守
敬以迄清季項名達戴煦徐有壬李善蘭之書旁及五
十三家曆法凡有字者靡弗徧究又兼習旁行斜上之
文廣羅泰西新著與古法勘校異同得其會同之旨前

輩名家如興化劉先生彝程金匱華先生蘅芳並驚嘆
推服謂足以掃千古積疑成一代宗匠云君心思縝密
治事有謀斷鄭海藏先生夙號知人每謂君有杜牧之
陳同甫之風若調物度宜明敷庶績以輔翼世運亦元
愷之儔也君初亦慨然有攬轡之志會迭丁內外艱者
五年比服闋而辛亥之變適作君避地海上作流入時
皖督孫某欲延攬君遣使奉書造請財教兩廳惟所擇
君婉詞拒之未幾所謂國會者成立鄉人倡言必以周
氏一人爲議員僉推君君又讓之於季父實之先生蓋
君陽示通脫而陰懷梨洲舜水之志旣覘知國事不可

爲退隱之志益決乃於滬西買地五畝結廬築園雜植
松栝棠櫻躑躅之屬春秋佳日輒與東南諸遺老詩酒
高會於其中泊然有遺世之志余屢廁遊宴縣歷二紀
每相見必談詩君自言少時習西昆體泛濫於陳黃門
吳祭酒諸家及聞散原海藏二老緒論遂幡然一變而
改宗北宋盡棄少作歲庚辰君年六十過二哀其四十
以後詩爲今覺奩集四卷督序於余余受讀一過七古
則法相寺華龍園巢園賞櫻諸篇寫景得昌黎東坡之
髓五古則出郭春夜不寐遊香山靜宜園輟茶室贈海
藏述事據情得柴桑少陵簡齋白石之長而秋懷六首

家人供烹蟹諸篇則又模擬都官力追鄉哲七言斷句
如滅燭海生殘夜月擁衾人語四更霜異種也堪稱國
豔繁英真欲裹春城意行漸覺屋移樹小立不知月上
衣嵐氣結陰成夕彩野雲分雨與春田吾輩猶抽將盡
繭羣兒已積後來薪罷絮池臺春易暮落花天氣雨餘
寒小爐熨手不龜藥大月照人無盡燈久客厭聞吳語
洵破春誰敵越兵寒皆昭文遺韻廣武同嗟夫名篇秀
句標舉易知獨其詩律精嚴盡祛聲病不侈談龍自然
叶譜乃至古體長篇亦力避複字此則余旣聞有素而
嘆其老而彌細者也方今文學凋敝中夏潰防君獨懇

懇亢精極思自樹一幟殆可以冠冕皖之詞流矣余在鄉言鄉未敢踰越昔刊皖雅嘗賴君集事溯流風而獨寫感不絕於予心稱情而道相得益彰已庚辰端陽後七日廬江鶴柴山人陳詩時年七十有七

閩縣鄭海藏先生爲詩負海內重名於後進少許可顧
獨盛稱至德周子梅泉數爲余誦其斷句相與歎賞以
爲難能歲己卯梅泉最錄所爲今覺庵詩四卷視余屬
定去取且爲之序余乃得盡讀梅泉之詩其勝處往往
能綜玉谿臨川兩家之長趣逸語俊光采四溢而中藏
鬱伊侘傺不可聊之深悲隱痛挹之而彌永殆所謂其
哀在骨者因益信海藏之知言而梅泉亦曰吾自幼搏
揖疇人之學偶有吟咏不過佇興成章耳年四十避兵
上海始刻意爲之當是時海內耆宿泰半僑滬爲流人
吾胥得從之遊而於海藏尤密益我亦獨多故集中所

存皆四十後作然久溷市塵塵壒中旣無以淑吾耳目
淪吾性靈而衣冠文酒之會復有名能詩而志行不足
稱道者亦不能不強忍而與之周旋集中署題有曰某
人者蓋從元耶律文正例夫所處之境與所接之人如
此吾之詩從可知矣悲哉梅泉之言也古之爲詩者達
則咏歌休明賡颺盛皞潤色一代之王業窮則諷政教
得失述閭閻間疾苦資觀民風者之采擇故其所作基
於四始通於五際降及後世輶軒陳詩之典廢郊廟朝
廷復無勲德可稱頌於是詩人之號乃爲窮而在下者
所專然其人旣不得志於時則相與恣游觀極酬唱舉

夫陰陽朝暝雲霞風雪之變幻崇山大壑疾湍飛瀑之
邃幽田園卉木鳥獸蟲魚之狀態一一探討而刻畫之
篇什所播千百世後讀其詩若歷其境撫其迹而想像
其風流此其山川朋友之樂有非勢位富厚所得而易
者它人或哀其窮在無入而不自得之君子固未嘗自
以爲窮也豈若今之倫紀禮法淪胥以亡兵革盜賊之
禍遐陬僻邑靡弗屈求躬耕隴畝長爲農夫且不可得
柴立互市之場以苟全性命孤呻獨謠自寫胸臆猶不
免取咎戾於人蓋曹劉沈謝李杜蘇黃以來無此厄遇
欲不謂之窮不可得已雖然世變無竟詩之道亦與之


無竟梅泉旣躬曹劉沈謝李杜蘇黃所未有之遇其詩
固亦宜有曹劉沈謝李杜蘇黃所未道之語安知天之
窮梅泉非所以玉成之邪余於詩無能爲役而窮且過
之書以復梅泉亦欲援此義以自壯耳新城陳祖壬

自序

余生多好而無所成晚清之際余家盛科第父師督舉業甚嚴而余又旁鶩於六書九數課餘輒私習之於詞章之學未暇及也年三十三遭逢國變避地海上從東南諸老遊始稍稍學爲詩四十以後始存稿四十六歲後衰癯坐廢蜷伏夷市故登臨遊覽之什僅於第一卷中略見之江安傅沅叔年丈嘗謂余曰子詩悽惋矣而不能得江山之助他日編集必興有詩無題之嘆曷強起薄遊鄰省名勝稍資以益其詩料乎余躡其言而病莫能從十餘年來目所接者自層樓馳道車塵馬矢而

外無他物因私疑天殆不欲昌我詩耶雖然吾聞之詩以言志放翁晚歲息影家居而忠懷壯志時時流露於詩中其佳者固不限於騎驢入劍門胸次收華山諸作也余雖未敢竊比放翁然硜硜素志則自信不爲波流丸轉者所移而於君國之思氣類之感死生離合之情尤拳拳弗釋一以聲之於詩讀吾詩者憫吾遇而哀吾志將并忘其工與拙又何區區題材豐嗇之是計耶余於詩治之不專所作亦不多五十歲時義甯陳散原先生曾勸余先刻一二卷余遜謝不敢從歲月不居今六十過二矣朋儕之好我者又復聳息之重違其意哀集

四十以後所作編爲四卷自念生平志事有存於詩之外者卽曩昔師友之謬相期許者亦不望我僅以詩人自限顧乃窮老自放奄然無所見於世徒以東塗西抹之餘災及梨棗媿負知己爲可悲耳庚辰夏四月至德周達



今覺盦詩卷第一

起己未訖壬戌

至德周達梅泉

早春巢園卽事

庭院悵悵釀晚寒
隔花迂徑雨初乾
殘梅未褪辛夷坼
小立東欄當雪看

春日幽居

未可逃虛且避喧
吟邊負手易黃昏
做將薄暝添梅韻
釀就輕陰罨月痕
臨水假山有真態
欹牆老樹出新根
癸辛街畔荒幽宅
車馬驚猜不到門

正月廿五日同宋筱坡遊杭州探梅煙霞洞作

早春梅始華塵居厭局促依依湖上山舊夢儻可續晨
征草徑溼迤邐傍寒綠歲初農事簡村靜雞犬肅曖曖
曉霧寒嵐氣上初旭南峯尤隱秀人家蔭修竹卓午抵
巖扉花光已照谷吹香欲破禪據石若傲俗東軒新拓
地危閣納遠矚三年我再來僧雛面還熟看山走瀛海
攬勝苦不足何如近局遊恍展舊書讀廣平振奇士勝
侶結遊躅平生邱壑志得子助張目吾衰欲何託世味
倦歌哭却笑聽水翁關心到沈陸

寺僧閩人舊住鼓山陳毀庵太保贈以長

聯有師自離山吾聽水世方沈陸獨看潮之句

游理安寺憩九溪橋上

幽禽隔竹已先聞衆綠遮天一徑分
泉亂知流昨夜雨僧閑長掩半庵雲
過溪未必關禪理聽水眞能了世紛
早識住山須本色參寥可許結同羣

洗心亭題壁

石上春淙漱碧芳一亭萬竹與深藏
幾人到此心曾洗負爾溪聲舌廣長

雨後入法相寺

寺閣欹斜踞石根礪泉新漲沒溪痕
連坡竹翠疑飛雨一徑松陰漸識門
山色悟將清淨理經聲盪作海潮喧
從知法相無分別參盡機鋒到不言

壑雷亭晚坐

老樹抽陰覆四圍
虛亭倚眺豁煙霏
巖泉嚙石聲原細
林雨沾衣溼亦微
面壁佛應經劫老
刺天峯欲拔羣飛
樓鐘打破塵勞夢
未著袈裟已息機

宿諏訪丸泊吳淞夜雨打篷背有聲

岸火檣燈望眼明
羈懷已逐暗潮生
那堪更聽蕭蕭雨
水驛疏更第一程

冒雨入彌山還憩嚴島神社

秋林殘雨任霑衣
更覓高寒入翠微
隔樹山禽如喚客
狎人巖鹿亦忘機
沙明水淺廊千步
閣迴窗虛海四圍

便欲結茅佳處住啼鵲底事苦催歸

遊長崎卡魯路司浴溫泉看八重晚櫻

散策春郊愛晚晴好山過眼不知名花如待客遲遲發
鳥似呼人緩緩行夾岸樓臺倚多麗極天波浪隔歸程
靈泉難已幽憂疾臥聽溪流作雨聲

遊耶馬溪憩柿坂擲筆樓樓對擲筆岩傳爲賴山
陽擲筆處

絕澗飛橋倏忽經溪山與我共玲嶸海雲分暝無情碧
嶺樹留人着意青擲筆料應驚造化居夷聊欲遁空冥
羈愁畏晚飄車去不記郵程第幾亭

月夜與何耀文步大元公園入彌山道

浮屠三宿豈無因
來向空山訪古春
微露清光松際月
頓醒塵夢樹邊身
一鐙闇照遙知徑
亂瀑交流欲斷津
上界高寒更何似
振衣未敢陟嶙峋

暮雨行抵馬關有寄

水軟山溫伴我行
雲鬟再見卜他生
回頭莫問銷魂地
細雨春帆又一程

春帆樓在馬關
甲午議和處也

題日本畫片

冷光浴溪雲空翠
溼林雨何人笠屐
來遙隔煙中語
秋江多白雲蘆荻
自淒冷沙尾暮潮
平斜日收笳簫

西湖法相寺僻處南山之奧遊客稀至而竹樹森蔚巖徑窈曲若別一天地余每往憩於樟亭輒徘徊移晷乃去

湖山亦何勞遊客趨如沸嬉春雜士女填谷擁車騎老夫耽賞寂靜躁本殊致復輿陟遠岑孤往窮所至法相亦咫尺境僻衆罕詣別峯尋徑入恰拊西湖背亂山峙屏障細礪瀉寒翠修竹欲到天午日不到地巖根老樟在虛亭聊可憩垣碑試捫讀約略散原記俊流恣題詠傳播成故事獨念觚庵翁夜壑悲已逝鄰村午炊熟鱸耕集婦稚桃源疑可到雞犬在人世天弢冀解脫世網

不我貸蹉跎十年心空有買山志

吳淞海濱旅館與鑄秋念祖茗話

空水澄鮮一縱眸心隨沙鳥共悠悠午涼人倦閒方覺
風定帆多夕未收容膝聊將齋作舫據牀直可臥爲遊
乘桴便去吾何惜直送雙江入海流

惠爾康酒店坐眺

芳甸數茵輭襯蹄新蒲出水綠分畦餘霞已斂林梢雨
晚日初乾陌上泥隱几閒情銷茗椀凭欄野色似山棲
五年躑躅行吟地記取虹橋路更西

北行過南宿州始見淮流車中寫懷

江干霽色送征輶，取次看山過宿州。
寫出荒寒惟落日，劃開蒼莽是淮流。
連村疊樹疑無際，去轍來轆各有謀。
我似陸生初入洛，中原睥睨欲言愁。

自留下鎮還經花塢憩僧舍

花塢略無花一徑，入寒竹不知篠簜深。
漸覺襟袖綠雨餘，嵐翠活林寂鳥聲。
肅流泉不出山，縈繞澗之曲道人眞。
面壁結屋在巖腹，一龕臥白頭。罷磬對寒玉，我行困燕趙。
窘若獸在桔，息肩向雲壑。暫領意已足，寒山憺世慮。
返景翳喬木，送客一聲鐘。窅然出深谷。

述懷一首並呈鄭蘇堪丈

稍覺孤標與俗妨
談玄述抱一迴腸
詩因破律頻加乙
琴已無絃懶更張
三語掾能辨莊老
五君詠早黜山王
高樓晞髮延朝爽
始信遵生別有方

月當頭和蘇堪丈原韻

短髮能禁澈骨寒
西樓露立幾回看
定知吳質眠難穩
不道方諸淚已殘
佛頂湧光呈寶相
天心倒影鑑冰盤
孤懸莫訝山河小
飛轍青冥恐未安

昌黎秋興詩青冥無依倚飛轍危難安

月當頭夕蘇堪丈偕拔可過巢園夜話

潑眼月如汞
高穹冪微霧
短檠度長夜
所得惟閉戶
眷

茲寂寞濱高軒肯相顧闐然排闥來翻疑纈眼誤今夕
是何夕當頭掛寒兔攤書方引睡得朋頓起寤高樓與
世隔小集亦成趣收身人海匿談藝先河溯奇文摭昌
黎眞賞發天悟高歌振林籜驚我鴉栖樹下士但大笑
魚鳥聞韶護又如說典謨索解及竈嫗世方滅文字秦
火烈可怖吾曹耽吟嘯強聒衆所惡猶當賴大雅振旆
起衰仆一射百決拾頽靡倚景附欲言意苦多統統街
鼓住徘徊步軒墀中天正流素冰壺濯玉盤照澈來時
路掉臂欲相從宵寒怯風露

讀陳子言尊瓠室詩漫題一律

閉門搜句琢肝脾空谷跽音喜亦宜造化癰疽誰復識
文章芻狗世方疑胥山青入遊吳屐隴水寒於出塞詩
盡洗箏琶捐俗耳九馱車馬任紛馳

哀張園

味莼園亦名張園位於滬之西鄙有層樓曰安
塏第窈窕軒閤可布百席樓外芳甸清池纖草
鋪茵明漪蹙翠都人士女飛輶夾轂過泥城迤
西者必於是中憩而品茗衣香擾擾每迫曛黃
游觀之盛蓋三十年來無少替也國變後游藝
場迭興茲園車馬日見零落近且轉貿於人改

建市廬高臺曲池夷爲榛莽余以庚申仲冬信
步偶過其地則流潦縱橫朽株狼藉蝨孺倚壁
已無故釘頽頽照波乃成秋鬢誦朱欄今已朽
何况倚欄人句頓覺百感沈沈來襲余心嗚呼
新蒲細柳杜少陵過而吞聲燈火樊樓劉屏山
寫其幽怨蓋不徒哀斯園亦自有地老天荒之

感耳

卅年繁勝壓南州閱盡春人幾白頭事去能無金谷感
詩成欲動曲江愁銅盤淚涸天應老珠館巢空燕不留
莫歎朱欄容易朽蓬萊宮闕也山邱

出郭

出郭意始舒飛車疾於鳥回瞻屋廬失極望村樹小冬
郊含隱秀薺麥青未了雖無巖壑娛林皋足幽討是時
澄宇霽初月澹樹杪意行無所擇適我俱爲好稍見臨
水村老屋翳煙篠場稼亦已登負暄聚童媪閒閒桑柘
間天繪入畫稿此中有真意迴盪激孤抱人生苦營役
殫慮晷昏曉舍之事鉏犁豈遂輸一飽世難如邱山收
身苦不早往哉游物初奮迅脫鞿褭

寄叔弼弟青島并懷勞勑叟

膠東齊舊封弦誦習未輟云何蓬萊尊竟遭左股截釁

啟奪牛細機伺捕螳黠未歸汶陽田已喋邯鄲血虞道
弗容假漢幟儻可揭惜哉棄墮甌易暴禍轉烈蒼波故
無恙夜汐助嗚咽前遊迹已緬萸葉九更迭柳台三宿
處巖屋翳清樾當時避秦人愛此片土潔殘山青不改
信美猶可悅良遊期屢乖結想意如失蹉跎豈余咎斷
渡怯溟渤行當及春暄紆駕振北轍溪樓覓舊題魚鳥
幸遺孑連峯迤左海深入窮巖嶠中有列仙儒冷抱狎
冰雪苦吟輸飯顆作計乃爾拙願從鬪黃精莫更念薇
蕨

冬日漫興賦呈蘇堪先生

入樓暝色隨鴉翻墮枝殘葉猶打門此中有人呼不出
苦吟兀坐忘朝昏漚西甌脫一片土閒塵草樹如江村
且從避兵匿藕孔奚勞遯世藏邱樊紛紛幾輩蠻鬪觸
碌碌餘子蝨處禪我非違俗俗違我異趨不啻王孫猿
飛揚閱世意久倦一壑聊此棲心魂傍家林館日可涉
有山如垤池如盆濠梁得趣不在遠魚鳥豈必皆鵬鯤
唐花出窖姪吐萼晚菰入饌甘連根偶然近局集朋舊
亦有兼味羅雞豚吾曹天許得閑放胡爲桎梏勞骸筋
海藏一樓望衡宇能哀寥寂時相存韓康入市漸無識
從知機泯馴鷗羣獨憐謁鼓能解穢傾聽往往移西曛

我雖習嬾尙健步猶堪追逐奔麋麇頗聞生事勝芋栗
妙墨能換千絲繆文藝於公已餘事看取志節凌霄雲
過秦有論託奇慨文欲作廣過秦論論近日興仆迭更之理肯留穢筆儕美
新乾坤清氣屬遺孑通德已足祛黃巾晴皋風日麗且
暄儻來共載尋嘉辰橋頭聞鶴語淒絕坐待冰雪迴陽
春

初乘摩托車馳騁郊外詩以紀之

蟄居意苦違簿書困委瑣駕言寫我憂適野庶其可追
鋒詡奇製歎欲飆輪火載客恰兩三跼蹐駢膝踝遠樹
隨低昂宛泛波心舸不聞鶯應和卻訝箭脫筈當前失

空闊蹴踏起沙埭翻羨奇肱奇凌虛步貼妥奔車古所
戒一蹶測誠叵何如尻爲輪萬物備於我騫騰雖夙志
垂老意已情聊與適莽蒼倚軫豁憂瘳

立春前四日雨

萬憂迫窮冬沉滯徹宵雨天意不欲春寫象入淒楚虛
檐恣點滴諦聽聲益苦撼撼響枯林沈沈和街鼓撫序
緬墜歡眷往念佳侶合衣夢不來風燈炯窗戶

辛酉元旦作

罩霧初陽薄爭林野雀喧微霜明瓦際瘦雪擁籬根道
豈庚申守詩惟甲子存牆東在人境底用覓邱樊

海日蒸朝爽樓窗掩宿霏斗依新歷轉寒入早春微皺
面愁觀水全天在息機未須諱言老種樹看成圍

人日書懷兼訊蘇堪先生病狀

不詣君平訊苑枯

吳俗恆於歲首就日者卜一年休咎

卻論符命託潛夫

鉤金注瓦爭僭巧止屋瞻烏感畢逋閱世真堪怒生癭
勝天猶可擲成盧花前雁後曹騰過佇看江春綠舊蕪

買薤露園墓地成賦二十四韻紀之

乾坤方板蕩吾窮將安歸生同弱草輕死共蟲沙微乘
化洪流中委蛻知何時永懷荷鍤志已絕首邱思悽悽
薤露園鬱鬱虹橋西賢愚同一邱列塚如耘畦我志在

速朽封崇焉敢希願言得片壤於此魂魄棲縱弗歸先
塋差勝委狐狸園葬況古制尙儉意可師延陵瘞羸博
伯鸞傍要離形骸反其根魂氣無不之憶窆婦殯時霜
露更十稔旣祔不改卜同穴悲無期煢煢念兩殤孤墳
邛水湄要令依吾傍毋俾強彪欺重門鎖葳蕤野花開
棠梨吾生與愁俱亦與愁同埋天道不可論收束宜自
爲無爲付兒曹龍穴爭撼疑矧余憂患身遲速視已齊
鵬告苟未來餘年且娛嬉玄文方屬草名山待攀躋緩
我以須臾遺我以老衰

正月二十九日雷雨繼以風雪呂塵過話因賦

風緊樓闌更一凭
池波猶澀水生稜
凍雷挾雨還成雪
小閣凝寒漸上燈
堆案楞伽聊可讀
多生福慧總難憑
餘年已分閒中老
漫羨南窗打睡僧

蘇堪先生患背癰子言爲詩問之余廣其意亦賦

一章

有生具三彭潛育每浹髓賦形劇么麼蟲睫未足擬犀
鏡試一窺萬態競恢詭厥性尤善噬蠻觸奮齧齒內攻
襲膏肓外潰成瘞瘡能令螬穴胃亦幻蝟入腎門局偶
懈防流竄及百體先生何所患遮莫適類此致疾匪內
熱詎爲學道恥世醫詡禁方千金易圭七昌陽與稀苓

紛進徒爲耳吾聞古至人貞疾有不死龍叔治方寸遑
恤痒與痕造化喻癰疽小大惟一理天倪導之和勿藥
亦有喜不見盧與俞論疾溯形始涵濡待自瘳非天亦
非鬼醫國理亦然培伐相表裏活人固有道方術等糠
粃願公哀痼瘵探智出囊底一揮三折肱瘡痍期盡起
吾言匪玉卮國身誼堪比

初春奇燠同小坡念祖仲衡遊半淞園

驅車穿隘衢曲折盤脩蛇入門得夷曠林水無蔽遮城
南一角地亭榭依江涯微惜意匠凡未足稱清華爲山
侈疊石礮礮徒杈枒種樹失疏密列仗如排衙我來及

初暄園卉殊未芽乘興在探梅百覓無一花稍喜挹江
光遠渚明芡葭廣堂閼畫靜列席聯吳娃春服脫茸裘
始欲披紈紗勺流引漕渠百錢舟可拏得趣卽濠濮豈
必窮幽遐虛亭攬蒼莽茗坐送日斜

二月十七日同小坡遴孫龍華看桃花

春陰互積旬春泥濺一尺出郊心浩蕩新綠滿阡陌姪
姪千樹桃疎密間菜麥所惜風力饕欲放意猶勒竹外
三兩枝臨水弄明燼幽芳但自賞永日斷遊屐感物愴
無豫適野忻有獲捩眼佛圖新窘步草塋仄晚鐘落闥
闥已與香界隔鄰村喚雨鳩壓樹春雲白

積雨初晴汪子實招同王莼農湯頤瑣龍華園讌

集賞桃紅芳已盡落矣棖觸影事悵然賦此

春衫漫惜酒痕稠出郭顛風似冷秋一雨洗紅成黯澹
千林罨碧儘芳柔竟隨流水匆匆去卻對吳天脈脈愁
多謝殷勤雙燕子銜泥還傍舊時樓

八重櫻遲開而穠豔特絕

絕豔由來畫不如漫勞著粉與施朱絳雲低壓春痕重
認取樓東第四株

天成標格足風流佳俠相逢尙暈羞莫惜晚芳開獨後
賴渠綰住一春愁

春夜雨止不寐有作

雨過月復明飛雲如奔馬夜風盪積鬱露立得瀟灑更
闌檐溜歇餘滴猶在瓦微馨出花氣涼意不可假空庭
流荇藻天繪孰爲寫春月勝秋月灩灩生澹冶神清無
睡情靜理契者寡翻愁朝日出人事復牽惹過眼戀清
景徙倚風廊下鄰樹翳深鐙知有未眠者

乘華大輪舶赴金陵經南通州下游江闊如海憑
眺灑然舟中賦此

江空岸樹微森漫有海意黃波接天流極望入無際朝
陽吐垠堦返射作霞氣心隨沙鳥遠意與閒雲逝舟居

簡人事璇室得小憩倦書拋午枕諷詠雜夢寢一堂萃
胡越羣醪各爲醉驚濤適臥聽雲岫接遐睇平生性樂
水浩蕩蓄胸次揚帆興已愜風日沉流麗不成三宿戀
聊假一葦濟湯湯逝不歸閱川如閱世

冒雨遊莫愁湖憩江天小閣

市盡畦涂荒一水彌其缺背江界微阜遙堞露環玦我
來值微雨涼意襲襟褐彎碣蔚菰蔣閒楮狎鷗鷺當年
勝棋處際會誕英傑吾曹非人豪小坐亦可悅家居孰
所壞締造愧前烈一枰付獨亂安用計巧拙運移功罪
惑定論視斷碣卅年三過此照鬢喜未雪傷心樓下水

曾見驚鴻瞥春波增感逝往事嗟灰滅誰與話滄桑惟

應梁燕說

甲辰先慙慎公總督兩江
余偕亡婦遊此今十七年矣

秋宵病榻有憶

殢雨飄鐙泥晚樓宵涼乍可卻蟲幃屏山夢短非關曉
檐鐵聲多不礙秋小病漸令衣帶緩遠書莫惜匣牋稠
悵悵脈脈三生意知隔星河第幾球

江華舟中遇霧時鳴汽笛以警來船徹宵爲之不
寐

輕舟犯霧行繁角警宵夢孤燈煮遙夜客意不得縱重
衾寒可戀攄隙隙覺霜重隨身伴詩卷短榻聊與共維時

旁死魄波路黑無縫葦灣辨漁火炯炯透層霧平生此
江水來去幾迎送所遇無故漚逝景若飛輕壯心到海
盡遠思經秋動賸欲歌鳴鳴流聲答吟諷

冒雨泛舟山塘遂登虎邱憩冷香閣憶壬寅歲偕
張大劍虹遊此已二十年劍虹墓木拱矣

霜橘勻丹柳糝黃做將秋色罨金閨雨寒重幙垂官閣
水曲孤帆出女牆永憶迴鐙聽吳語竟成留眼閱滄桑
尋常便有傷高意減盡風懷未減狂

墨芬招同雨東鑄秋遊靈谷寺

連岡鬱周遭煙際辨叢樹黃茅深沒髀樵徑劣可步透

迤四五里到寺日已暮堂虛僧語細龕壞佛胛露客來
忘世法茗坐卻供具林花疑遠近醅醲息微度意行撥
蒙密藤蔓冒衣屨天光燭幽闇苔氣蒸磳戶荒寒懍久
淹閑寂適小住矧茲秋望美楓荻絢丹素殘陽分雁背
魚貫躡歸路笳吹起清哀亂山莽迴顧

辛亥後初入京師客邸感賦

土鏹篝鐙夜倍長鳳城羈思感新霜邊風欺柳成頽綠
微月籠沙寫淡黃入洛衣冠叢世謗原心功罪付天亡
駝鈴不識西來意也送繁聲攪客腸

遊翠微山憩祕魔崖作

西山拱京師肅立如排衙翠微據其腹巖壑尤清嘉盧
師卓錫處洞戶森豁訝冽風嘯饑虎涸澗盤脩蛇奇石
鬼面皺枯樹猿臂叉霜紅隱叢綠奪眼疑春葩縈迴三
百曲直上凌煙霞渾河落眼底一線穿寒沙茲山起太
行支脈流荒遐蜿蜒落畿甸餘勢猶騰拏爾來六百載
佛宇窮高奢世移龍性改代謝如空花貴人身豈閒亭
榭徒增華可憐清淨域車騎盈顛涯帝鄉不可見霧堞
棲昏鴉傷高歌五噫弔古聞秋笳

遊香山靜宜園

谷虛天露根木落山坦腹雲林知幾重嵐翠不可撲梯

巖構臺榭佳處各爲屋長廊行不盡流水與之曲川原
攝吟眺煙鳥沒寒綠微風塔鈴語幽籟若爲續衣塵感
行役暫憩意已足逕欲擔蒲團來就經樓宿

峯迴境忽異蔽路松栝長西崦背斜日未夕氣已蒼燕
郊例早寒葉赤知雨霜微泉織磴道碎礫明溪牀山僧
解世法迂客開竹房當年布金地選佛餘空場煙鐘沈
晚韻冷卉留孤芳不辭踏葉深漸覺秋衣涼

秋意不可寫寫之以寒泉秋聲不可尋尋之在樹間聽
泉復倚樹我來心悠然諸天梵唄寂微度清磬圓聲聞
一時斷相對忘靜喧安心契微旨奚必逃枯禪亂峯掩

頽綠偃蹇趨窮邊長風遠塞來澹日愁孤懸

碧雲寺

香山富精藍碧雲實綱領入門瞻具足松栝亦嚴整花

宮矗高下一一掩幽迥苔蒸欄瓦鏤石迸沸泉冷

別院有泉

作硫磺臭疑湯泉凝冷者

宸遊昔臨幸輦道沒荒梗天題嵌壞壁欲

讀氣先哽祇園僧衆散夕殿闕深影猶餘七塔在佛力

仰昭炯孤筇入鴻陣儼立諸天頂沈憂聊自放窮玩竟

日永域中無常戀矧此須臾景缺月挂藤蘿含愁度西

嶺

病起口占

一病拚教絕萬緣蹉跎心事又花前閑宵隱几燈初穗
薄暝鉤簾月未弦苦與周旋惟藥裹不隨戎削只吟肩
衰遲也作春遊計檢點青袍換舊綿

蘇堪先生饋武彝水仙小種茶賦謝

密雲團月出官焙古法已失誰可證爾來滇洱漸撫製
揉碾塗膏飾肌瑩武彝所產獨殊絕露蘂雲芽天所孕
陸經裴述漏品第晚出還推谿勝叢茝喬幹各異質
八等強分論難定迴甘不畏寬饒猛消渴能蘇茂陵病
草茶亦自誇逸品顧渚雖佳難與競政如論書判雅俗
婀娜終當輸瘦硬入春病隔苦中滿寒具堆盤憎餽飭

滌煩導壅待疏瀹得此何殊甘露贈水仙小種發珍襲
乍覩佳名訝幽靚開緘見面知磊落和介猶存君子性
故鄉野薺供久缺夢想松蘿滿山徑

吾邑產茶歲直鉅萬松蘿毛尖銀針

皆佳夷風別嗜酥酪點亦類薑鹽味乖正老妻解事慎

封裹佳客留煎佐清詠不須隨俗鬪旗槍飄鼎爭看乳

花迸

閩茶多細碎入湯不見旗槍

花朝日作

輕寒門掩似山家髡柳初稊草未芽暮雨曲中真聽雨
百花生日竟無花春愁積似雲堆絮影事消如浪捲沙
一念思量拋不得竹鑪湯沸喚茶茶

朱有燉元宮詞十
三嬌小喚茶茶

次韻奉和蘇堪先生見答謝饋武彝茶之作

宛陵論茶區七品詞豐趣博誰與京紛紛圖譜亂人意
侈夸色味崇浮名豈知尤物不可議一握已敵千瑰瓊
從來真味出枯淡詎以魚炙輕太羹佳人佳茗喻奇確
魏徵嫵媚吾能評便當攜鉞入深竹斟酌畫意搜詩情
龕官陳乞笑癡絕相哀舉贈非要盟幽人耽吟已苦瘦
無取久服求身輕聊將佐讀澆舌本夜堂破睡書聲清
春日讀書漫興

寒勒初花意尙慳暫憑丈室課安般虛廊風掠涼生雨
壞壁落封遠當山舉世不爲成獨往無人可詣是真閒

雄文漫薦相如似未畢玄經媿鬢斑

炳燭程功計已迂箴膏發墨費爬梳談玄雅具廣長舌
千世曾無闊扁書剥復久疑天道遠知聞漸喜俗緣疏
試迴浩蕩郊原目一角家林畫不如

龍華重到紅芳已稀懷舊傷春攀條興感賦呈蘇
堪先生并眎鑄秋

畹晚尋芳意較癡不辭載酒賞空枝傷春日爲高樓斷
望遠心隨去鳥遲零落易成幽草恨蹉跎猶及綠陰時
有生常抱無涯感愁見斜陽寸寸移

登龜頭渚望太湖作

我昔訪梅入鄧尉還元閣迴寒猶淒漁洋西塞落眼底
鏡簌婉孌呈蛾眉今來泛牒過管社撇波上下如鳬鷺
平湖濫濫不受唾微風碾出青玻璃涵虛入渾萬古色
吐納夕月溶朝暉煙中縹緲辨浮嶼蒲帆去與鷗俱遲
坡陀倒浸石齒齒一半已付崩雲薶摩崖鑱削見山骨
插天積鐵無成虧具區古稱匯衆水包吳孕越曾何疑
渚上有摩崖包孕吳越四字甚巨東尋欲盡日所曬風生濤湧將安歸
伊余萬事坐磨蝎惟有濟勝天所貽巖花洞草若舊識
武陵有路寧終迷橫雲小築盛遊屐我來暫止忘疲饑
綠簑青簑若可假浮家更欲隨天隨

冒雨遊南山道還憩湖莊有作

侵曉湖雲懶不收，縠紋乍輭已勝舟。
過橋山與人相待，落澗花隨雨競流。
供具野僧諳世法，摘茶春女習村謳。
十年枉說勾留好，水閣三間錯未謀。

吳淞海塘眺望同蘇堪先生作

戍樓一角矗危津，三夾分沙渺際垠。
天外斷雲垂海色，柳邊殘日亂車塵。
水寒蜃氣連波起，機盡鷗羣與客親。
誰識纏綿家國恨，江頭野老獨傷神。

先生第三子勝之歿於吳淞同濟學

校

遊南湯山浴溫泉憩陶廬有作

重岡細徑轉坡陀不厭相看客裏過飛轂輕於春舸泛

亂山濃比夏雲多解衣磅礴原無垢濯足滄浪舊有歌

有扁額曰滄浪小築

萬劫沈沈同一洗人間其奈熱官何

朱子詩客來爭

解衣萬劫同一洗

雨後狂飈坐海藏樓賦呈蘇堪先生

虛廊茗椀足閒情坐覺涼生野葛輕惡雨何心催日去

孤樓得勢與天爭觸山力盡猶餘怒倒海聲多總不平

未盡年時飛動意臥聽檐鐵亂秋更

時方與先生議爭清室優待條件事

題陳叔通所藏江弢叔手書詩卷

江詩苦澀愛者誰觀槿齋頭始見之海藏揚挹極齒頰

漸令舉世驚瑰奇詩人遭亂例窮蹇善作苦語悽心脾
中興開山幾鉅手巢經秋螻胥倫魁伏敵幽潛晚始褭
異軍突起張偏師並時熊盛亦健者斂手籍湜推昌黎
憶從拔可乞殘帙欲覓全豹無由窺冷攤三卷落吾手
疑有詩魄陰扶持流傳餘事到翰墨研牋短幅書春詞
陳侯裝襲視球璧鄭叟題字翔鸞螭亦如坡老贊和靖
詩肖東野書西臺稍嫌倔硬骨勝肉猶喜逸氣行間馳
文人一藝有不朽苦希三絕甯非癡我生于書略無得
執筆十指嗟沈椎心聲心畫悟一理固哉妄別妍與媿

丙夜

丙夜房櫳甲煎消雲收片月隱廊腰吟邊涼思鉤簾怯
靜裏風聲挾樹驕空枕通詞原有託謝橋證夢已無慘
此愁可待箋天訴聽雨挑燈又一宵

緘札

緘札親將密語攜銷魂只在桂堂西秦娥已分身隨鳳
徐甲終教骨作泥百劫難迴如覆水多生不泯是靈犀
銀牀一夢無拘檢又聽花冠翠羽啼

雨夜病榻

紅樓一隔便無慘和夢將愁度此宵不慣秋堂聽碎雨
病身底事喻芭蕉

吳淞礮臺灣望海

難束雙流一往情
滄波初澹月初橫
海山兜率吾安適
虎帳牙旗意已輕
東盡水雲連島國
西來樓艦鬱江聲
寒潮兀自無人管
卻道能當十萬兵

雜憶四首

一飲雲漿便是仙
又隨青女鬪嬋娟
何因不畏吳剛斧
獨抱高寒自在眠

珠娘曲罷卸殘妝
卅六鴛鴦已斷行
錯道孫恩是兵解
有人供作水仙王

已謝年芳更畫眉
雲屏一夢至今疑
平生未讀金樓子

枉效徐妃半面窺

忍寒褰莽宿中州離合無端怨蹇脩說與蕭郎渾落漠
梨花謝盡不知愁

聽鍾二庚鼓詞

易逝情懷墮莽墟又迴殘淚向歡娛興亡過耳紛千劫
咳唾隨風落萬珠漫以顛狂誣鳳女聊堪排遣付花奴
華燈照席星沈海不信江南綠已蕪

祕魔崖次陳弼庵太傅題壁韻

承平日暮惜來遲坐聽松風出世悲一代俊廚存碩果
卅年掌故付殘詩憂天板蕩甯終古留命桑田有後期

癡絕韓陵呼共語晚寒寥泚立多時

亂後重登江亭同鑄秋小坡作

却後誰尋浩浩愁殘陽惜我不多留壞牆山湧滄溟色
敗葦風掀麥浪秋寂寞一龕同茗話銷沈百輩閱詞流
人間回首成憂患翻羨枯僧早白頭

盧溝橋

桑乾源自潦涓發曲折雲中瀉沙出

桑乾發源于代北馬邑水經注之潦

涓也湯湯遠挾塞愁來流入盧溝更嗚咽盧溝近接春明

路終古黃塵簇京闕馱鈴已自苦淒涼更送行人踏曉
月曉月銜山幾度明人間已見滄塵滅石闌步步昔遊

處皺面重尋意悽切風輪一轉倏成世辛苦黃雞催白

髮

余年十二從先慤愼公遊此今三十二年矣

回看家國積千恨未死傷心

向誰說橋頭戍鼓亂津渡橋外蒼山峙環玦詩人不冶
江南秋卻走渾河看落日隻堠孤亭一片愁蕭蕭飲馬
傍寒流豈知中有興亡淚注海經天浩不收

自居庸關南口穿八達嶺止青龍橋登長城作

疊翠無盡藏客行忘顛疲奔車銜尾升一線盤天梯長
城攢劍戟遠脈來安西高瞻若建瓴仰轟摩撐犁緬昔
閉關代於此封丸泥設險界蕃漢行旅嚴征譏爾來關
孔道日夕飊輪馳窺邊絕胡馬荒服咸羈縻從知蕭牆

憂不在羌與夷操戈構同室遠略安所施書生鬱懷抱
弔古臨邊陲渾忘出塞愁苦覓荒寒詩置身入決莽沙
鏃欲刺衣礪樓據巉削侷步窮攀躋日車墜懸巖低與
天根齊君看磧柳旁澹月如秦時

青龍橋車站題壁

車爭蟻徑苦盤旋縮手新寒欲折棉斷峽截天通一線
亂山戴日入無邊眞成飲馬長城窟誰與悲歌勅勒川
卻笑希文窮塞主可曾題壁到燕然

壽陳散原文七十

恂恂元季盡儒脩奧廣平生見太邱早羨拂衣除世網

眞成袖手看神州

文於戊戌政變後嘗自號神州袖手人

甘陵鉤黨餘殘

籍寶祐登科屬俊流亂世重名誰得似直將詩筆作春

秋

用海藏
序中語

舊事

舊事侵尋強半忘翻從閒處著思量開簾月學新眉瘦
隔水鐙飄獨穗涼懶與癡人頻說夢從知心病本無方
兜鞋記近花陰立消受瓊階一夜霜

贈梁衆異

五噫歌罷始言愁賃廡來牽岸上舟世議輕於吹劍首
危邦險似浙矛頭舊名張祿何曾變複壁邠卿孰見收

底事避人翔不下機心元自屬沙鷗

嘗詣訪爲
閹者所拒

功罪難憑洛蜀爭飄然玉貌去圍城張羅已失南山鳥
飲酒何關北府兵恩怨盡時公論出風波定後此心平
書生不作西涼簿千首猶堪萬戶輕

壬戌十月之望東坡後遊赤壁時也寒月皎然信
步野外有作

後公第十四壬戌十月之望涼蟾圓冷齋無客復無酒
夢想赤壁江聲喧垞東閒畝足散策意行不惜分宵眠
竿燈街樹入寒望人影在地月在天樓闌隱約峙斷岸
屋山複疊橫巉巖微聞巷犬吠獰豹了無露鶴翔飛仙

維公畢世困遷謫欲家陽羨愁無田宦蹤遊跡略可攷
居黃三載多名篇雪堂來去亦偶爾卻成兩賦資流傳
摹圖綴詠播異代文人好事誰能捐我生於坡百不似
獨與磨蝎相爲緣歸山誓水負夙諾晚營一壑聊可專
百年今夕落吾手況有皓魄同清妍佳辰七月坐放失
留待霜夜成追歡平生勝情乏勝具幽憂簡出恒窮年
尋常十事九敗興英遊矧復天所慳江山文藻後遜先
但餘哀樂過前賢苦搜陳迹供俯仰多情一笑看華顛

微辭

苦作微辭託楚芳蛾眉惜誓已堪傷風旛自動心常寂

底事避人翔不下機心元自屬沙鷗

嘗詣訪爲
閤者所拒

功罪難憑洛蜀爭飄然玉貌去圍城張羅已失南山鳥
飲酒何關北府兵恩怨盡時公論出風波定後此心平
書生不作西涼簿千首猶堪萬戶輕

壬戌十月之望東坡後遊赤壁時也寒月皎然信

步野外有作

後公第十四壬戌十月之望涼蟾圓冷齋無客復無酒
夢想赤壁江聲喧垞東閒畝足散策意行不惜分宵眠
竿燈街樹入寒望人影在地月在天樓闌隱約峙斷岸
屋山複疊橫巉巖微聞巷犬吠獐豹了無露鶴翔飛仙

維公畢世困遷謫欲家陽羨愁無田宦蹤遊跡略可攷
居黃三載多名篇雪堂來去亦偶爾卻成兩賦資流傳
摹圖綴詠播異代文人好事誰能捐我生於坡百不似
獨與磨蝎相爲緣歸山誓水負夙諾晚營一壑聊可專
百年今夕落吾手況有皓魄同清妍佳辰七月坐放失
留待霜夜成追歡平生勝情乏勝具幽憂簡出恒窮年
尋常十事九敗興英遊矧復天所慳江山文藻後遜先
但餘哀樂過前賢苦搜陳迹供俯仰多情一笑看華顛

微辭

苦作微辭託楚芳蛾眉惜誓已堪傷風旛自動心常寂

尹役何分夢易忘早識推排成泡影祇餘報答是淒涼
多情天與單棲慣不信人間有玳梁

葛雲生師自丙申別後不相見者二十六年壬戌
十一月遇於蔣蘇庵許追話前塵涕笑并集賦
此以呈

拊頭少日愧童烏逝影騰騰不可呼偶話舊朋同點鬼
苦搜往事似追逋聲吞家國千憂積意盡江山一句無
憶共檣燈淮浦夕碎冰流月過珠湖
丙申自清江移家揚州師亦同舟南
下行次秦郵湖冰塞天舟膠不得動雇役打冰以行

偶成二絕呈蘇堪先生

雲鬟緘札自風流三載籌邊始欲愁誰喚詩人作重九

南疆早識鄭龍州

先生詩筆至龍州而一變功業亦以邊防爲盛時人但知鄭重九而不云

鄭龍州何也

射虎屠鯨願已乖一樓天與巧安排何緣占得南洋路

千載爭墩到簡齋

陳簡齋詩題奇父先至湘陰書來戒由祿唐路而僕以它故由南洋路來

夾道皆松如行青羅步障中今海藏樓亦在南洋路馳道交蔭春夏之交亦如行步障中古今巧合如此

按南洋路於壬申年改南陽路

詠意大利石刻美人

難從皮骨論妍媸著眼分明欲語時突兀最憐秦女化
溫馨不禁漢皇窺鑿開混沌終何取鍊到通靈亦已癡

長日祇宜甘后側較量玉質與柔肌

讀杜詩

已拚痛飲愁來讀底用悲吟死不休我欲探原星宿海
江河迴看盡支流

冬夜

馬滑霜街夜有聲拋書猶戀短燈檠月纔生魄難連曉
雞爲驚寒早報更往事兜心勞反側新愁和夢不分明
枕痕細襞千憂患力命相持未易平

雨後挈兒輩散步浦灘飲茶沙利文作

雲頭閣雪作輕陰又踏街泥問水潯漸遠帆檣迷海色

久羈兒女變鄉音身閒更祝兼人健詩拙難安一字吟
浩浩市聲鴉鵲裏據梧不覺茗盃深

書味盦主人將有之罍之行雜敘年來蹤跡爲二
十五韻贈之

技也進於道豈謂賤者事所惡冠帶儔枉道翻媚世是
知第人物不繫名與位歐陽傳伶官高識出叛例方今
人紀墜黷亂過五季公然爲盜賊相斫亦如戲轉覺戲
有益歌泣見忠義自我初識子神理驚朗異海藏每謂
我此子善根器吾始亦翫忽久乃覺彌粹旋聞折節讀
呬唔效童穉論語略上口左史資聞記日鈔嚴常課墨

瀋沾袖袂偶步涉子室亂書疊如砌縱橫紙硯筆堆案
雜酒豉宛宛一學子賢固不以藝卽以藝事論亦足張
一幟海藏今張顥劍器喻筆勢天壤契孤賞芬采不終
祕吾狂語無擇瑣屑入敘次差信非苟作有譽必有試
子行自此遠燈火隔夢寐窮島波春天相念字頻寄知
子介于石流宕可無畏猶當勤磨礱書味兼道味

次韻和石遺立春前一日值東坡生日過飲巢園

賞石像之作

人生安得比石壽莫以長星廢杯酒辛盤賺得石遺詩
落落花枝生老醜惠之塑並道子畫一樣通靈心應手

石不能言酒如泉何如坡飲張家園紅妝細馬自俗物
但愛梅蕊迴春魂詩成先寄魯元翰彩旛笑倒霜顛銀

東坡有立春前一日寄魯元翰詩

歲不盡二日過靜安寺酒肆有懷亡友貴念祖用

東坡殘臘獨出韻

十年幾同遊愛此面野肆黃墟卽桑海擎淚對蕭寺至
人澈生死謂譬得美睡我老尙津梁未了一大事來牛
憐去馬辛苦方寸地萬感入孤顰驚鴉亂寒吹

短檠

深雝未必關前世有味何當返少時百巧千窮仍故我

檠

祇應牆角一燈知

文與可詩文字一床燈一盞只應前世是深讐陳后山詩百巧千窮只短

臘月二十九日作

瓦溝朝雨滴初乾短景瞢騰又晚寒多難試看雙鬢髮
一嬉聊敵百憂嘆因人熱豈梁鴻願沒世名知李志難
了我餘生有薺蕢未應五十殉微官

是日忘后山

夢中得斷句醒後足成之

秋草漸成無意綠夕陽依舊可憐紅

夢中句

替人垂淚綠

何事做盡淒涼短夢中

除夜和東坡三詩簡海藏石遺

饋歲

荆楚紀歲時舊俗得證佐假物相勞問意不在財貨堆
盤海錯富發籠山果大提攜庠僮僕打戶驚晝臥兒童
競棗栗笑語燈照座老夫何所得歲歲驢轉磨窮巷絕
貴游投報孰相過饋我但詩筒一唱再三和

別歲

妄念纏冤親聞道嗟已遲歡悰疊陳陳散失不可追亦
知歲無窮其奈生有涯譬彼走坂丸一去無迴時偃蹇
賓客疏跳擲兒童肥莫搜已逝懷當前聊遣悲春色終
還人後飲吾何辭向來後山翁得句能起衰

得句起衰
年後山除

夕書
懷詩

守歲

守歲妨宵眠胸際蟠睡蛇終焉捨我去百留不可遮歲

舊旋復新我老當如何未死期立言詎恃窮而譁

戴表元序

元次山集謂今之人未死而求立其言貴者以位富者以力窮而譁者以黨

光陰爭杪忽意

盡更鼓過欲知代謝情視此燭淚斜上壽無百年一半

成蹉跎覆水如可收華年猶可誇

今覺盦詩卷第二

起癸亥訖戊辰

至德周達梅泉

開歲四日雨

齷陰亭角綠生苔
破睡無方乞茗杯
遙念飄燈歌舞席
雨中閑煞好樓臺

首春卽事

無多點雨上花枝
有幾分春轉柳姿
單枕伴將初月夜
一寒閑卻踏燈時
是非但聽盲翁鼓
生死猶纏獨繭絲
青眼看人吾亦倦
賸迴百念入支頤

水仙花

寒女臨流掠淡粧託身原自異羣芳西鄰老盡黃居士
枉卻田郎賦國香

早春下海浦野望

春人幾輩已山邱又見春波早白頭沙外落帆依海月
雨餘新水翦淞流衰翁也解芳時恨詞客空懷易代愁
報答韶華無一事傷心仍在最高樓

東亞茶樓同雨東小坡作

市樓對矗兩山開坐斂羣囂入茗杯轂擊誰云王道坦
夜行多似錦衣回伊川披髮吾何惜裸國文身孰見猜
強覓芳菲蘇病眼看人紅紫打圍來

吳淞海塘春望簡衆異

詩卷光陰減帶圍行歌聊用釋憂歎江豚應候還吹浪
沙鳥親人欲傍磯近海風饗春不冶抱堤滌落水難肥
扁舟可得迴天地卻見抽帆自在歸

共鑄秋夜話

驗候微聞雁北翔不關愁處也俚俚夜澄草露能迴影
月黑池波自受光世味奚如茶味醎書燈更比佛燈涼
春寒縮手吟邊好祇惜宵譚與睡妨

過協平里

覓愁無處只樓陰又見新巢換舊林歧路一般南北異

侯門恨比渭城深

冒雨獨遊六三園賞櫻

老嬾嬉春意未衰卻緣車馬費驚猜

園門有路
警查車捐

殘寒紙

閣成虛掩微雨郊園只獨來響屨伎歸花下徑點茶客
坐石邊苔少留便作居夷想社鼓神燈晚更催

年年例遊龍華賞桃今年因病簡出至則落英狼

籍悵對空枝感舊傷春惘然賦此

麗質由來苦折磨芳時容易得蹉跎生憐薄命能傾國
死戀餘香有逝波春色幾分塵土賤人間終古雨風多
韶華底事輕拋負卻對殘紅喚奈何

輟日本茶屋贈太夷丈佐以小詩

遮頭一把茅竹窗冒以紙客來脫屣登數座各憑几自
我此屋成漸喜識茶理夜燈耿相依聽雨若篷底今年
花竹長蒙密上階祀南巖塞戶牖屏蔽失其美豈謂山
可移將毋室可徙久奧忽得曠引目一失喜稍稍平瓦
礫續續引清泚雨足鼃魚生樂此水中沚華嚴無寶相
起滅現彈指妄念雜愛憎幻覺吾亦恥

空桑豈無情緣盡去便休楚弓泯得失但願佳處留浮
生孰根蒂住屋如牽舟云何負而趨夜半驚力道藏壑
慮不固藏海計或周階前託盈尺豈曰徇道謀落落數

株松鬱鬱百尺樓茲屋蝨其間蟻垤儕山邱使君昔有
居門對江漢流舊燕移巢痕楚尾今吳頭蘧廬雖云隘
萬象資冥搜還君浩蕩心來此盟輕鷗

海藏榜此屋曰
盟鷗謝用漢上

舊居
名也

茶屋旣徙於其址鑿池引水爲流觴修禊地池成
欲招客讌賞而殢雨連朝作此遣悶

小窗花覆雨深深欲被憂端不可尋徙屋尙留因樹影
引泉也學在山音極知觴詠皆陳迹卻喜濠梁有會心
池上篇成還獨賞松篁相對起蕭森

石遺有釣徒何必煙波遠淺渚撈蝦卽富春句余

最賞之小池初成作此比附

柳綿未盡更飛花
睡起微馨出揀芽
雨足陂塘看蝌蚪
不應淺渚羨撈蝦

積雨書悶

江雲着意吐遙青
樓望陰多礙柳屏
殢雨看花都作葉
款春有夢不宜醒
輕衫當戶寒仍換
細格鈔詩倦易停
閒煞袖中遮日手
卻來池上補魚經

三月三日雨

積陰屋角篆廚煙
苦盼頽陽一破顏
無主風光原是客
難湔憂患已如山
水邊多麗誰能覓
林外奔車似不閒

強遣佳辰對窗紙初燈隱几聽鴉還

春夜雨止書懷

暫憑几閣與溫馨意亂渾如困宿醒雲罅漏星明復隱
花稍留雨止還聲欲言終吐喉中顰已敗猶談紙上兵
誰信謀身輸百巧只除磨折是天成

得衆異廈門書却寄

海水羣飛日吐吞祇從花底辨朝昏道高不信魔能祟
事去安知舌尙存秦楚際宜成月表國身通豈屬微言
人閒處處青燐屑更爲南天一寫痕

時方讀明季稗史南天痕諸書

雨後池上

客去涼波拍檻平只除春水孰干卿
頽雲不解留殘照
嘯鳥終嫌雜市聲了我生涯醒醉夢
賺人天氣雨陰晴
江湖自是相忘好莫向悽悽說有情

乘小輪舶溯黃浦上駛至新龍華港寫望

埃衢飛轍苦縱橫乍對滄波覺有情
水上樓臺屯海舶
煙中笳吹隱江城晚碣待渡人爭聚
淺港通潮荻自聲
林外檣燈舷外月一般寒影不分明

曉雨初霽同葉德之桂鑄秋家息庵叔循丁家山
西壩入法相寺憩樟亭欲登南高峯不果

晴湖明豔雨湖奇我意尤覺輕陰宜
涼雲漠漠覆春曉

兼塘行盡逢花溪綠疇無水麥自潤微惜草徑滲新泥
笠蓑耕野已叱犢人家隔崦猶聞雞南山路入漸窈曲
連林墮翠寒生衣筍輿軋軋若鳴臚巢禽隔樹時驚哢
濃青堆面徑疑絕斗轉石級開欽崎樟亭更立脩竹杪
俯瞰殿脊如承欹神物千歲猶旦暮我來讚歎眞蠡窺
靈山標幟賴有汝元氣不死凝霜皮斧斤所赦豈無意
留與造物稱支離同遊但愛枝葉好煮茗坐對忘朝饑
我生樗散定何用材不材際奚從違經聲未得淨世慮
翻從寂寞生清悲頗聞佳處在絕頂中峯峻極懸天梯
衰慵初地亦自足崇高仰矚愁顛危

月下自西園泛舟越裏湖穿西冷橋歸新新旅館

作

林樹樓臺淡無縫
霧月溶溶壓波重
空明一舸泝流光
我與湖山都入夢
平生不識月湖奇
直疑世界成玻璃
水禽驚起誤天曉
衝煙飛上蘇公堤
穿堤波冷浸山足
山民愛結水邊屋
疏燈零落挂魚罾
知有湖莊人未宿
二更涼蛤鳴菰叢
露脚吹散因微風
舟行不繫若有繫
恰與流月同西東
三更欲盡四更轉
登岸打門吠村犬
幽人但解水明樓
忘卻冰輪銜缺蠟

西湖和家人息庵叔韻

柳絲不繫過湖船
澹蕩詩宜澹蕩天
嵐氣結陰成夕采
野雲分雨與春田
買山得笑居人後
假日銷憂屬眼前
好祝勝情如此水
鬧紅漂綠自年年

壽余堯衢丈七十

罪言功狀漫評量
志行誰堪比潔芳
早日循聲滿章貢

暮年詩派壓湖湘
去官聊免神明疚

用曾文正天
津教案語

辟地

終期海宇昌三世
論交說知己探懷
一札感心藏

丈以
教案

去官

先慤愼公方督兩江馳書
慰籍丈引爲知己每見輒樂道之

公和舟中

睡餘步履泥船廊
檣尾輕風作午涼
海客乍逢機未起

鄉音偶觸耳能詳扁舟天地將安適殘照江山爲底忙
去浪來漚流不盡人間多事是興亡

題海藏樓

築樓聽松風樓高風在下夜半起驚濤冷然而善也

南京揚子飯店旅次

纖月風林始挂鉤船燈明水水明樓牀頭越茗能妨睡
牆外吳歌不解愁

苦雨歎南京下關旅次作

閒居聽雨趣自好逆旅愁霖轉煩惱瀟瀟一夜滴愁心
避漏移床喧達曉樓西地盡何所見合眼江湖生浩淼

隔城鍾阜半雲薶潑墨濃皺米家稿我聞西北嘆連月
盡喝百昌變枯槁何不隨車雨甘澤卻注東南恣傾倒
彼憂火熱此水深坐待日出歌當心其雨霪霪河大水
深日出當心古歌
也諺儒生侈言拯溝瘠微抱可得通鑒臨冷巷無車泥沒
骭朝報取看憎斷爛江聲蟲語不分明祇爲幽人助吟
歎

病起示癭公伯夔

霜訊頻催菊訊慳昏窗坐數夕鴉還感秋人意傷枯樹
望遠雲愁接亂山已覺蟬蛩異喧寂更從燕雁較忙閒
中年諳盡無聊味扶病聽歌笑我頑

臘日樓望

朔吹翻江逼歲殘
刺天孤抱鬱危闌
飄燈小閣蕭蕭晚
釀雪閑櫳細細寒
斐几海連鉗水動
竹窗風戰紙聲乾
一蒲團外千般事
底用將心到處安

甲子陽歷元旦獨遊邑廟飲市壚作

一冬吟事付支頤
簡出猶將趁晚曦
衝潦顛車憎路确
背城小市見燈遲
繁霜天地心終苦
短景陰陽序暗移
了覺逢人無意緒
可堪孤醉緩千晷

癸亥后山忌日作

后山昔有言人自窮
非詩矧乃詩未工
畏窮如蛇虺論

詩及同光豈不先南皮官大詩益好此論吾所嗤伏敵
與巢經異軍起同時壇坫或未尊沒世光不黯后山屈
卑官名與坡谷齊凍死天下惜風節誰敢訾無甯緩須
臾百甕消黃齏耽吟至窮老詩境尤恢奇達有在衡門
窮有居綸扉抱冰當晚年祈死如孤嫠君子全其天素
位行何疑斷斷較窮工進退胥盲隨吾論雖詭激不爲
前人欺若參曹洞禪棒喝當屬誰

歲暮旅次有感

華年去我似奔湍行脚如僧尙掛單久客厭聞吳語淘
破春誰敵越兵寒

樊榭詩春寒來似越兵來
適有蘇浙開霽之謠故云滑稽玩世

賓堪戲孤憤成書說本難眼底沐猴盡高位只除優孟
是衣冠

開歲四日雨賦呈蘇堪丈時丈將復入都

一雨迴春力未勝官池波活已銷冰閒中得健誰能與
放翁詩造物與閒還與健貞下書元詎可憑十返艱難心不悔兩朝

獻替記堪徵

李德裕有兩朝獻替記

輸君退食金鰲筆更續浯碑

記中興

六三園賞櫻同鑄秋小坡作

寂寞誰尋物外蹤殷勤來看舊時叢花光不爲春陰掩
茗話能消客意匆樓外釀寒衣又換酒邊弦唄女偏工

蓬山贏得劉郎恨，開落關心隔淺櫳。

子言歸自廬江，以洗沙宮餅見饋云。純廟南巡

時，其先德迎鑾潤州，蒙賜充什中有此一味，仿製至今，風行一郡云。

麥隴吹香溢齒牙，重羅飛雪裹錫沙。叨分天上官廚味，宜配人間小餅茶。蕊押班名傳故事，公羊師說笑專家。士貧舊德猶堪食，莫漫紅綾院體誇。

甲子中秋夜雨時，淞滬方被兵。

流雲點染夜淒清，雨脚難遮露脚明。渺渺懷人誰與共，夢夢視爾若爲情。樓頭長笛橫吹曲，詩裏秋笳變徵聲。

我自看天憂覆壓山河影豈計虧成

哭羅癭公

平生重氣類風義師友篤晚歲獲定交得我君所樂疏
狂遭世棄君獨相煦噢槎枒見肝肺文字契骨肉廿年
閱人海衰盛迭起伏惟君甘沈冥閉戶若窮谷妻孥守
寒餓給養缺祠祿餘錢但聽歌顧影日不足佳人不遺
世生是天使獨憐才到榛苓此意難喻俗大好致大怪
積謗高如屋我時左右之爲君助張目戈矛生肘腋讒
口攢利鏃羣兒空張皇坡老正捫腹豈知蠱蠱微含射
亦有毒明銷膏自煎身殉母乃酷年時君善病病起詩

可讀如何蓋棺定積稿不盈束憂生復念亂一瞑詎非
福死生臂屈伸海山得歸宿迴車歌舞地百念迸一哭
鬼妬遽爲殃天奪抑何速

癭公歿後始得玉霜書卽題其後

北書隔紙淚初收燈影幢幢雨壓樓萬念湧潮餘一慟
孤生閱世累千憂雁聲催送愁邊節蟀語驚迴心上秋
今夕懷人兼感逝宵長無寐數更籌

壽袁伯揆母夫人八十

世亂意苦多娛親萬事足壽昌坡所羨五十着綵服尙
書昔歟歷坐鎮八州督家風寶慈儉門內雍以肅令妻

今壽母燕喜頌宜續佳兒挾天手文采照湘麓韋平徵
閥閱王謝數眉目舉觴屬伯仁保世大其族綱維痛解
紐非孝說尤酷亂源孰與遏賢者賴移俗京卿能養志
脫屣萬鍾祿從知翟翬榮不敵板輿樂白眉信最良羣
季亦嶽嶽永依愛日暖堂背暄可曝斜橋梅始華介壽
躋海屋吾文非溢詞有譽視此牘

人日徐園探梅

傍郊林館足徘徊客意蕭然對茗杯雨似麴塵飛不起
人如社燕去還來

屋角疏枝不耐看水邊閒殺曲闌干誰憐人日花前雨

已作江南二月寒

陽歷已二月

破臘爭春蕊未齊
連林風色晚淒淒
十年人被花看老
猶向池廊覓舊題

芳時寂寞肯來遊
隔座吳音似水柔
不惜驚鴻留影去
借人明鏡寫春愁

遊女有造像者

穿牖頽陽一破慳
虛堂心遠卽深山
牆灣過盡千車馬
可肯來消半日閒

漚尹侍郎屬題彊邨校詞圖

遠桃浙派近毗陵
七子吳中詡審音
不廢江河流自在
同光詞客邁元金

國初詞派駁雜不脫晚明陋習自浙常兩派先後開宗詞始入格而律或

未精吳中七子晚出雖自詡審音亦得失參半同光以後詞風丕變宗匠迭興不獨弁冕一朝亦且抗追兩宋

夢月空青異幟張北詞支派啟文襄能探星宿源頭水

終讓歸安老侍郎

張文襄書目答問取國朝詞固於七家且屢入空青夢月兩集人或不知

解余謂文襄北人病北人不工倚聲故藉此張之非定論也

近代詞壇數二文蘇辛豪宕繼清真寧知七寶樓台手

教外傳燈別有人

文道希學蘇辛文小坡學清真皆深入堂奧惟夢窗最難學六百年來得

其嫡髓者侍郎一人而已

善本難求四印齋半塘心血已成堆虞山功自先河在

百宋精刊讓後來

簾影橫波惜別時銷魂絕代冶秋詞遺臣老作聽楓客

更耐長年落葉悲

簾影橫波指侍郎庚子時圍城中侍郎與半塘老人唱和

不

輟成庚子秋詞一卷去歲移鄭吏部爲落葉詞紀之都下名流和者甚衆

缶叟支離擅寫生空中傳恨又圖成忍翻天水傷心局

一角殘山分外明

圖爲吳缶老繪

初夏遊新康園卽寄衆異京師

終古誰能忍與看沈憂常覺至無端大千餘此園林好
小雨能生麥夏寒樓角頽陽成代謝花陰啼鳥有悲歡
故人京洛如相問爲道心情似嬾殘

送太夷丈赴天津行在

愚叟移山志未灰虞淵伴日遇堪悲民訛不信蒼天死

世難甯憑赤手夷韓偓金鑾應有記杜陵行在豈無詩
危城猶進經筵講心史他年待補遺

泛舟吳淞至三夾水觀海而還

雨掃秋前暑潮生夕後風星光知媚水江影欲騰空川
上吾何歎蘆中士未窮滔天流不返孤往更須東

和某人韻

鳶肩已厭刺天飛一着煙蓑便息機居近滄洲租吏少
詩含神霧解人稀舍南春水魚苗長屋後秋蔬鴨脚肥
漸聽兒童效吳語白頭江令不思歸

乙丑重九同散原伯揆帥南半淞園登高同作

危闌凭處首重迴殘柳新芙晚訊催雁背秋聲連角起
雲間海色上衣來池臺幸與兵塵隔懷抱難因茗碗開
吾輩先知似山鬼陸沈未暇後人哀

題陳叔通百棣書屋圖卷

萬梅擁柴門勝蹟圖頻伽遮頭無一把快意言徒夸陳
侯一百株香雪枝枝斜一株占一幅羅列眞滿家愛棣
愛其魂古墨森枿枿生香出紙上味不輸寒葩漢川手
植處洞口餘煙霞買山與賃廡所得誰爲奢澹游一尺
縑貴敵金千鎰佳名適闇合無取爭墩譁焚香忝諦觀
眞實非空花畫中若可居着我曾趺跏

和太夷丈津沽九日登高原韻

彌天笳吹亂邊聲世難如山未易平北海居濱容有待
西陵種樹莫辭行偕亡聊可抒悲憤祈死何煩計重輕
欲語難開孤月口一星帝座眼中明

送黃秋岳之漢皋

饑鳳猶能振羽飛霜韞一擊事難知甌塵不爲詩人掃
舟壑頻看大力移衣上縱橫江漢雨篋中凌亂楚騷詞
危機倚伏誰堪喻鈴語還當問獨師

秋岳於馮玉祥入都之次日有詩曰

西堂一夢已驚秋夜半真聞失壑舟
我自甌塵愁不掃誰能鉤曲羨封侯

題趙叔雍高梧軒圖卷

羣峯張疊屏一水涵衆美因樹更爲屋梧竹繞階砌屋
中着吟人書帙共臥起戶外直青瘦搖綠上窗紙畫工
誠狡獪天巧契神理頓使好家居突兀現毫底平生棲
隱志佳處尙虛擬十年湖上廬萬瓦已櫛比君宜專一
壑茅茨帶清泚無使土木殃黥涅到西子不然春申宅
且住亦可喜但留圖卷看望梅渴聊止

檢理亡友遺札付裝得羅癭公書數通展讀愴然
卽題其後

珍重平生意餘芬篋衍儲難追劉沼答應續櫟園書

周櫟

園輯並世名人書札爲賴古堂尺牘新鈔

鬼簿名堪點神交迹未疏江東數

行墨消得百畝畝

野鶴翔霄迴孤星向曙遲一牋留絕筆七字賸題碑

公瘦

遺囑請散原書墓碑作
詩人羅癭公之墓七字

風趣船山近才情獨漉奇迴腸

千萬意付與玉霜篠

巢園看櫻之飲瓶齋伯揆貞壯次第成詩余不能

無作爲長句紀之兼視秋岳拔可

經旬寒雨苦沾漉失喜朝窗麗晴旭牆陰湧出千瓊瑰
天遣芳華慰幽獨玉顏薄怒頰在頰素靨微醺紅暈肉
移根辛苦出蓬島絕色何妨非我族詩人好事託比興
侔色揣稱難更僕夭桃太穠李太淡差比海棠睡初足

蕞廠得句涉非想忽爲梅蘭助張目爭妍邢尹當避面
知味熊魚皆可欲春城一角漸爛漫取次尋芳鬪輕轂
六三園裏三十樹雀啅蜂喧趁遊躅歸來吾廬更恣賞
傍水依林兩三簇貪多未得姑愛好獨擁名姝在金屋
東欄二株尤可念低壓春痕覆羣玉停盃且莫傷春晚
卜夜爲君爇銀燭十年不踏江戶春後樂園荒樹應禿
倚天照海昔遊處合眼紅粧滿山谷飄零可復思故土
紺雪千山萬山覆稍憐不副國花號開落匆匆嫌太速
根芽愛護記手植漸覺高枝出簷角年年花下置杯罍
花外迴看幾沈陸哀時念亂落江海草木有心喻歌哭

勞生閱世花閱人願祝看花鬢常綠

亂後重見宋大奉廷卻贈

解沸天傾十四年漸收青鬢入霜顛懸壺尙有韓康藥
負郭曾無季子田衣上塵猶認京洛眼中人已老光宣
羣兒自貴終何羨一榻安心覺汝賢

憶共承明謁帝歸斜街並馬試春衣秦簫燕筑都零
落項蹶羸顛有是非小腆原無年可紀大同已料願終
違故人漫笑煙霞痼應識沈冥是鏡機

太夷丈自行在歸招飲海藏樓卽席賦詩次韻

奉和

白首行朝肯便歸孤懸北斗誓相依凡亡未必楚猶在
人定從知天不違事有難言休問訊棋無可着枉成圍
十年已覺從公晚倘許能窺杜德機

雨夜書感

鳴廊碎雨夜堪憎欹枕新寒曉漸增衰鬢稀於秋後葉
禪心定似佛前燈共看天墜甯憂杞已料霜繁竟履冰
閱世飛揚吾亦倦翻思有味是無能

讀太夷丈天津張園海棠詩次韻奉和

傾城流落共天涯況惜芳時意倍加絕豔易縈遷客恨
春陰猶護舊叢花金盤華屋難爲伴淺夢重簾定憶家

莫對瑤階傷夜雨
人間小劫有風沙

冬夜不寐有作示夔厂

餘年傀儡幾登場
往事車輪九轉腸
滅燭海生殘夜月
擁衾人語四更霜
安心訣外無靈藥
遮眼書中有睡方
一念堅牢終不返
明夷誰信託陽狂

酒罷意煩散步林薄

吹面風多酒力微
近郊日晚市聲稀
意行漸覺屋移樹
小立不知月上衣
笠屐東坡宜獨往
江湖謝客欲安歸
弋人繒繳終何纂
彩鳳誰憐未奮飛

寄懷太夷丈天津

文成經進付誰鈔海雨離居想寂寥事去重光哀故國
心蘇臣甫戀行朝癸籤詩雜中唐味海藏樓詩第十卷將續刻丁字
沾分晚步潮人厄天窮兩無悔羨君一羽傍雲霄

閱市無慘遂登天韻樓最高處

津梁疲盡客安歸三界微塵辨是非三界指大世界新世界三
遊藝場清露肺肝如可濯危欄性命與相依賓鴻北嚮先
春去夜鵲南移帶月飛風遠歌聲翻在下高寒有夢也
應稀

送荃旺兩女北行歸途感賦

北轅南轍各逡巡送汝依依病後身骨肉已傷垂老別

江山猶伴獨歸人亦知墮地來憂患翻羨承歡屬賤貧
極目荒原寒吹裏萬鴉如葉葉如塵

比歲偃蹇幽憂傷人日者言吾命宮坐磨蝎五年
業滿當自脫今其時矣戲作長歌送之時爲丙
寅除夕聊比於昌黎送窮河東解崇云爾

我生安歸叢百憂春非我春秋非秋命宮磨蝎爾何物
逝將去汝如決疣我躬頑健過黃犢契虛久絕三彭仇
爾縱二豎煽毒虐凌轢臟腑疲筋脉鼻噴瓜蒂眉灸艾
一室殄殍如天囚我宗婣睦久垂訓少長抑抑崇儒修
爾吐赤舌肆構間諛語箕帚成戈矛使我垂老遘奇變

骨肉散作波中漚我忝世祿列通德席豐幸得承先疇
爾引耗賊入我室金盡不啻肱篋偷其餘十事九乖迂
跼蹐天地誰余儔我食或噎夢或魘我居則嘆出則愁
乃至賓客偶晤對亦復齟齬招愆尤東家翩翩大腹子
體輕善作夸毗柔西鄰要津策高足招邀貴顯喧車騶
爾乃望氣遠斂避矚室不敢稍凝眸獨與窮薄苦纏綿
顛倒一世無時休昌黎遷謫坡放逐仁賢爲爾遭虔劉
爾罪若髮擢難數殛爾不待祈募收置汝冰雪之窮窟
放汝瘴癘之炎洲游魂變滅鬼爲讐萬劫不復超泉幽
從茲祈報降百福舍奧媚竈張新猷翁前偃拜婦子後

誠格儻荷神垂庥召和消疹不遠復閭門已見祥光浮

殘夜

殘夜又收羣動去獨留憂患在人間開門覓夢了無迹
月挂西牆如破環

贈吳我尊

誰道儒冠誤汝來楚優齊贅任疑猜早嫺鞿譯稱都講
晚繼芬芳有善才舊侶猶談春柳社新聲曾聽紫雲迴
教歌乞食元和叟玩世佯狂等可哀

三月十三日巢園賞櫻之集諸貞壯有詩用韻和
之兼呈在座諸公

勤護深根茁舊葩
凌寒十雨九風沙
感時自撫前朝樹
濺淚猶開劫後花
海角餘春成幻住
樓東晚豔莫輕誇
邱遲苦說江南好
只傍嚴城聽暮笳

和貞壯詩竟復成一首
感物託諷意固不在櫻也
朝霞幻采夕陰生
千睨難將百態名
異種也堪稱國豔
繁英真欲裹春城
花前念亂人俱老
劫後攀條日易傾
莫怪紛紛桃李妒
從來尤物是天成

壽黃石孫年丈七十

少日風塵鍊骨堅
耆齡矍鑠得天然
全談玄殊覺阿戎好
謂令子作吏無妨叔
夜賢歷下題襟名士貴
青州從事公渚

酒人傳

丈曾任青州守遂家焉

使君舊治存周禮高臥應忘海左

遷

海岱移家勝本州濟南瀟灑閱三秋冥鴻誰得羈蒙叟
竹馬爭看頌細侯永叔歸田成績錄蒞林浪迹話前遊
津橋相憶聞鶻客天缺誰能補不周

曹靖陶以其先德文正公手植紅豆見贈并屬題

看雲樓覓句圖

漸江水抱一樓斜畫裏相逢不當家無恙青山還識我
多情紅豆又宜花哦詩送日天何意避地全生計未差
應是有心成出岫浮雲吳會感年華

讀衆異江亭稷集詩寄短句調之

煙柳斜陽竟入詩故人厚祿報書遲
鰕生亦有霜盈鬢未必能令四海知

原詩有四海笑余霜滿鬢之句

同張棟村桂鑄秋家弟祥五放舟出吳淞口觀海

距前遊已二年矣感賦一首

汀蘆岸草各依依涵影初看一雁飛
地盡島雲沈夜色波明星漢滅流輝
方秋願夏情何極閱水成川世已非
吾亦乘桴欲東耳投荒九死不言歸

虹橋路書所見

晚風簫鼓趁神祠恍遇承平日
莫時老屋借陰瓜覆架

閒廛拓界僅編籬素心陶令南村客合眼涪蟠鄉社思
此意十年誰識得鷓鴣聲裏雨千絲

夜坐

竹露蕉風滿暗廊候蛩吟逼二更涼高樓近海秋先覺
缺月埋雲夜未央原憲安知貧是病次公誰識醒而狂
移巢燕已如羈客幾日容棲舊玳梁

時方擬賣所
居屋償債

感事二首呈散原老人兼視伯揆

中央四角却將殘虎豹森森尙九關莫笑才人頻乞郡
最難寒士盡歡顏求田那得東西瀼招隱曾無大小山
一事貪多餘自喜風懷少作不須刪

中郎阿大盛當時門戶終傷後起衰共訝茶村猶舉火
漫憐爲老已無錐北山幸免移文至東郭何妨鞞履隨
賴有解嘲陳正字人窮原自不關詩

鶴亭爲仇家誣陷走避海上詩以訊之

韓郎未覺故鄉親

用韓熙載語

水繪園荒半委塵客裏漸憐

秋可禊

七月十四日爲秋禊日

愁邊初見雁來賓杯蛇自昔能疑

影冠虎於今解噬人漫動歸心思下澤風波慣作不羈
民

早秋坐園池與客共話

柳際疏蟬曳一絲坐憐殘暑不多時緯蕭菊爲防風偃

擎蓋荷猶冒雨支冷趣寒山逢拾得閑蹤襲美訪天隨
求田問舍家人語高論年來已漸卑

鑄秋約往仲弟寓中觀扶乩之戲王漁洋李次青
梁節庵李梅庵次第降壇詩詞頗楚楚可觀偶
及時事亦談言微中感賦一首

人間同調屬伊誰帶荔披蘿我所思詞客有靈來恍惚
蒼生前席問然疑祖龍已緩今年死山鬼空勞隔歲知
祇合夜窗消寂寞秋鐙共讀鮑家詩

萬國青年會面跑馬廳爲滬西最高之屋憑欄而
觀全市在目惟不能見江海耳卽景賦之

傑閣莊嚴抵布金
蠡窗鈿戶晝深深
良工自具通天手
遊客能生出世心
碧樹藏鴉喧晚霽
綠蕪盤馬散秋陰
憑高不見東南坼
底用危詞擬陸沈

感興

侏儒苦飽朔憂飢
各趁因緣判跼夷
小好偏能招大怪
有生底用逐無涯
虛舟不觸心何競
飄瓦難全事已知
誰分柴桑厲高節
楹書至竟付癡兒

答訊某人和贈之作

案頭平水欲成書
門外鷗陂已就蕪
街樹影疏明列缺
池荷風定躍姬隅
雌黃偶下頤能解
堅白終持道不孤

舊事武林誰可說浩然齋裏問潛夫

再答某人

細逕坡陀草不除意行安步可當車談玄喜過揚雄宅
思痛重繙越絕書澣統百金方自惜堅匏五石用多疏
家居漫羨纖兒好垂老辛勤有一廬

四郊多壘欲生愁耳畔鵠聲勸少留擇樹園應除惡木
穿渠泉不改清流簿書共信文無害老病欣逢藥有瘳
一事艱難惟飯顆苦吟勞汝望山頭

黃浦灘公園夜坐

露華如雨泥車塵水驛初傳第二更波靜魚龍消怒氣

月斜烏鵲有寒聲
閑街埽葉秋仍淺
遠市收燈夜更清
莫話海邦興廢迹
銅仙眼底最分明

園外有巴夏
禮銅造像

後二日復遊

拍檻涼波意不平
辭柯悴葉有離聲
廿年事逐空江去
一個人依片月行
澤畔孤吟聊自放
沙中偶語漫相驚
誰能乞弛金吾禁
坐待燈殘水夜明

園門亥正卽
閉禁絕遊人

久亢得雨煩熱頓祛園居卽事

案頭野馬苦紛馳
窗下槐陰看漸移
雲似山容增偃蹇
鳥如夷語雜侏僂
好風獨據開軒爽
疏雨惟于閉戶宜
堪笑生涯輸脈望
可能食字不憂饑

日暮偶入徐園遊客散盡淒寂感人坐至初更始歸

小院迎秋桂蕊稀蟬聲高壓市聲微月遲已見疏星燦
林靜旋聞宿鳥歸籬落有鐙驚蟋蟀鑠廳無慢走蚍蜉
尋尋覓覓閒蹤跡漸怯新涼透袷衣

戊辰七月得陳飛公計賦詩挽之兼示余穀民穀
民飛公壻也

雋才會了牘三千老注楞伽第幾篇悲鵬鳥逢庚子日
哀江南值戊辰年漫郎身豈奴官屈淮海詞因女壻傳
舊館記尋沈陸處望平街月澹于烟

飛公嘗寓神州報館神州報停刊後

飛公懷然顧舊館
曰神州陸沈矣

夜起

絡角星河拂曙流
迎風荒簟不宜秋
萬聲沸雨蟲專夜
孤影窺人月上樓
夢斷來蹤迷去跡
愁多舊管入新收
迴潮五十年間事
帶水拖泥也便休

七月廿五夜聽雨不寐有作

擁衾隱几兩無憀
引睡惟堪乞濁醪
月黑屋山撐亂影
雨深塵海抑羣囂
涼真到骨恩何在

陳簡齋詩一
涼恩到骨

熱不

因人意自豪拚對一鐙聽
澈曉秋蟲瓦縫助蕭騷

以詩向劉翰怡京卿乞所刻沈注王荊公詩集

羨君解治乾嘉學存佚功多勝掩枯忠義儒林雙列傳
莆陽泗水兩潛夫周草窗號泗水潛夫劉後村莆陽人亦號潛夫留眞不數黃
堯圃合璧應參李雁湖笑我苦吟艱飯顆乞書能媿一
甌無

寄震兒荃女旺女天津煦兒蘇格蘭煒兒美洲

誓水難酬肺腑恩崎嶇家國久聲吞生兒敢恨卿慚長
有女甯憂盜過門亂世文章如草賤衰宗名德賴人存
應憐郎罷窮兼老萬里看雲目易昏

與伯揆談近事有慨

牽愁同入夢中夢閱世深嗟觚不觚誰分暮年更蕭瑟

未妨大事亦糊塗天真好弄人搏土生本無聊鬼畫符
吾欲云云究何益翻疑慰藉是揶揄

和某人韻

漸知強聒取人厭聊可相憐共此心哀者不能使之樂
後來或亦視夫今官資堆眼憎猶取世網櫻身縱復擒
荼苦薺甘嘗已遍蓼蟲生計足牆陰

狂飈驟雨三日夜不止衢市悉成澤國伯揆有詩

見示作此奉答

牀頭漏似折釵多檐際聲如決牖波倒影小車疑泛艇
渡人深巷訝馮河蘇端頗畏衝泥訪坡老甯能戴笠過

賢劫污塵同一洗要將淨土換娑婆

八月初六夜作

樓西纖月招愁痕飯飽聊從閱市門綴樹燈疑迴電笑
殷街車似學雷哼儘饒傾國人難再未必如雲我思存
說着自媒吾亦恥一生不負幾黃昏

雨後書所見

人如逐隊羣鷗泛樓似瀕湖一鑑開斜日半街聞喚渡
柳陰漾出小車來

苦雨初晴野潦漸退同散原病山漚尹十髮公渚
伯揆徒步至某氏園列坐廊廡秋花絢爛木芙蓉

蓉亦盛開口占四絕視同遊諸公

舊雨來從新雨後拒霜開到傲霜前
請看座上蒼顏叟何似庭中老少年

作者堂堂得七人山王貴後亦清貧

謂病山
漚尹

諸公各抱

青霞意祇有嵇康嬾是真

是非死後孰能詳帝女花殘海亦桑
圍坐豆棚聽不倦

黃家垞當趙家莊

是日十髮談張獻忠之亂
楚王郡主殉國事甚詳

鴨腳雞冠傍砌栽疏花爭冒晚涼開
西風埽淨閒庭院算看秋光第幾回

八月初九日同散原病山漚尹公渚伯揆放舟至

吳淞口觀海同作

孤根日夜浮身世與悠悠海湧有聲月江吞不繫舟安
歸何所懼忘返謂之流莫羨沙鷗穩吳波晚更愁

下海浦眺望口號

十年九亂苦兵塵長作羈棲海角人我本有田歸不得
可憐無語謝江神

乘汽艇至吳淞口觀海呈同遊諸公

癡兒何事苦牽惹日坐車茵跼膝踝仙侶同乘尻作輪
英遊慣使船如馬淞流盡處合黃浦

吳淞江即今所謂蘇州河夾岸

屋山矗鱗瓦萬喧歌吹雜邪許波際拏音聽亦寡行過

周沚漸清曠蟹舍漁莊競瀟洒沿緣汀汜逐鷗鷺潑眼
秋光供陶寫風來四面水三面盡拓篷窗洗杯罍略無
山色豁吟眸喜有江雲描淡冶維時秋仲月半破晚秀
猶堪媚平野潮頭遠吐一痕白三夾積沙似龜赭廿年
埋恨此江水照罷朱顏照衰髡衆死悠悠閱世新逝者
如斯肯相捨看盡前漚散後漚不知到海幾多愁扁舟
枉想迴天地人已華顛浪白頭

戊辰中秋憶震兒荃女旺女天津

憂亂傷離更念衰今宵酒醒最堪思淡黃月似瞿曇面
疏落星如國手棋微滓太清終不損逢辰秋土轉增悲

遙憐萬里陰晴共兒女鄜州解憶誰

同鏡夫季昭登惠中層樓眺浦江晚景甚麗卽送

季昭返里

不在吟邊在畫邊等閑奇景失當前落霞波湧珊瑚海
薄暝雲橫玳瑁天去雁寒烟窮塞主歸人明月下江船
淹留我豈因紅袖也聽吳歛十七年

韋莊使蜀以江南亂遂留不返賦詞

以見志有騎馬踏斜橋滿樓紅袖招之句

吳波平似碧苔鋪波上帆如水上鼻白認積沙判江海
青留遠樹界蘅蕪塞鴻社燕秋相代漁火檣燈晚更孤
豈不懷歸終有畏故山那復識今吾

棣浦兩女將東渡日本觀嵐山楓葉余以老病坐
廢未能同往相送登舟悵然有感

蜻蜓洲上舊吟人七載沈薶坐廢身我老難求乾淨土
汝行儻見太平民插天雪嶺留殘火簇錦秋山勝好春
波路望洋餘一嘆涼宵飛夢逐尻輪

爾雅東至曰
所出曰太平

讀史

老臥行窩號安樂春遊比戶迂柴車如何間架行新稅
幾使堯夫喪舊廬臧穀羊同歧路失古今貉本一邱居
案頭斷爛憎朝報成敗吾甯盡信書

日本寄大正一切經樣本來漫題其後

幻身原不著天花入海何妨更算沙
乞與趙州東院住
五車讀罷讀三車

淞口觀海之遊客有畏水不敢往者詩以調之

狎海平生似狎漚儘教晏起與科頭
臨河却笑公無渡
閉戶真成臥可遊
大浸至人原不溺
濁流此士忍輕投
坳堂杯水如相假
一笑從君泛芥舟

秋晚同公渚叔通伯揆共話于巢園西池

偶談誰可續
漁洋清話聊堪繼
菰塘池面皺
于人面皺
柳眉黃過月
眉黃莎蟲織
夜千聲急
絲雨添秋一味涼
知我非魚子
非我江湖有樂在
相忘

贈王小徐

不逐光宣士論譁同文館裏舊生涯測成圓海九容鏡
算盡恒河三界沙北學人推羣玉府東來法受大林牙
秦官留得張蒼在白髮談天漫自嗟

王君小徐少耽絕學晚治相宗於因明唯識諸書
無所不窺復博覽禪門諸家撰集科玄並究空
有雙融實不慧生平第一畏友也前詩未盡所
懷復成此解

倉梵佉盧溯一源三分白雜七分玄馬駒遍踏南州土
獼獠能爭北秀傳兜率幾人窺內院

彌勒居兜率天內院爲相宗初祖

楞嚴十種黜頑仙只愁下界風輪劫贖欲從君避四禪

倉海君

當年倉海求奇士爲報韓仇狙暴秦誰料亡韓卽倉海
一推翻中子房身

鏡夫自皖中來書詢滬居近狀並問曾否東遊作
此答之

坐榻成穿老更慵年年百戲看魚龍玄黃戰野曾無首
赤白探丸尙發蹤上策只除三十六蓬山恨隔一千重
吳船昨夢乘潮去放手量江勝翦淞

寄余雨東南京

狐鼠猶將廟社憑，獨兒祇解亂棋枰。
眞愁謝客爲山賊，欲喚蕭公作騎兵。
感舊惟思京口酒，可憐爭唱石頭城。
寶釵桃葉傷心地，打槳重逢似隔生。

八月廿五日伯揆悔廬招同小集用俳體調伯揆
鮭菜能兼豈謂貧，主稱短李客迂辛。
飲憎酒濁妨賢路，嚼愛飴甘勝女脣。
未解臨淵魚亦羨，客有畏水而嗜魚者不煩見
彈轂先陳平生洛蜀無偏袒，袖手相看罵座人。

劉翰怡京卿屬題 崇陵補樹圖

圖爲吳興劉翰怡京卿於距今十年前所繪也
比來天崩地坼 山陵震驚羊年馬月之殃赤

眉揚髡之酷至非爲人臣子者所忍言 崇陵

雖幸免浩劫而 享殿鞠爲茂草 神林夷作

薪爓又豈當年補樹人意料之所及哉余窮老
不死遘茲奇變空憶謝朓金粟之吟未親唐珣
石函之役盱衡君國負疚在心披覽茲圖不禁
憤痛媿感之交集也

曼珠王氣黯陪京陵闕依依晚照明一漑敢云人力盡
孤忠甯以散材輕種松何日爲龍去樹漆他年待器成
元夜西風寒食雨白衣羅拜莫辭行

幽宮隧殿隱黃塵梁格莊邊淚洗春未改漢家一坏土

敢移臣節兩朝人九泉根護潛龍髓千歲魂棲化鶴身
今日山南新鬼戰金枝玉葉委樵薪

犬馬恩深義敢忘敝軒戀舊喻堪傷覆陰豈料藏梟獍
累葉曾經宿鳳凰木擇禽如禽擇木桑生海又海生桑

祇今野哭聞私祭不見天家更捧香

天家一騎捧香來
林德陽咏六陵詩

衣冠負土遠追尋把臂梁髯共入林種日曾聞星在尾
花時儻見粟成金春霜秋露前王歷錯節盤根志士心
五度麻鞋憐顧絳 崇陵恨比孝陵深

吳董卿薄宦廿年清貧如昔比來毘甌南歸將有

新都之行以詩奉訊

豈謂青雲久致身祇從菟海問珠塵楚騷僕命能加理
晉帖唐臨足亂眞吾輩猶抽將盡繭羣兒已積後來薪
別枝莫笑蟬聲曳客座還多假寐人

書廣禱机史荆駝七載眞同一擲梭粉署郎官潛邸老
人材令僕塞街多渠成未必非秦利幟拔其能奈趙何
祇恐逝波憎皺面青溪今日是恒河

戊辰重九非園題糕之會賓主集者三十五人

寒吹蕭蕭拂茗甌借人亭館又吟秋地偏欲與蝸爭角
霜早猶慳菊上頭自昔老非容合傳並時華管亦同遊
等閑不識宣明面翻覺平流勝俊流

五十初度述懷八首

僕四十初度曾作述懷詩六首今更十年矣日月易得五十平頭家國多艱窮老洊至此十年中所遭遇可歎可詫可笑之事雲詭波譎有萬非四十歲時擬測所能及者世變日益深生事日益蹙文舉覆巢之懼莊生沈陸之憂水雲故國之情皋羽冬青之恨長言不足託以詠歎變徵爲聲將歌當哭讀者憫其遇而哀其志焉可也

五十平頭號始衰有情天亦苦推移蟻旋不救風輪轉

駒逝難迴日馭馳文武道悲今夕燼祖龍死恨隔年遲
哀時自瀉傾河淚豈爲閒人拭涕洟

虞賓削號廁陪儻千古驚聞叛局開焚惑星看貫南斗
鼠兒年記哭西臺茂陵玉盃求難返嬴國金輿去不回
賸取井中心史在鐵函留與後人哀

嬴顛項蹶等倉皇著論何心與辨亡竟有佳人甘作賊
不期鮑老也登場蒙皮誰識麒麟植滅燭羞爭魑魅光
一石中間如礪大南陲北際苦相望

江山本自屬吾曹五嶽歸來壯志消紅柳紀程雙隻堦
朱櫻感舊一一重橋春泥竹轎南屏雨夜雪船燈北固潮

老去待賡霞客記西風簷鐵響蕭蕭

二重橋在日本東京

小築園池數畝宮十年種樹傍牆東柳如秋鬢經梳薄
楓似衰顏借酒紅賣宅價應慚慰祖買山隱豈問深公
相逢舊侶堂前燕欲認巢痕漸掃空

何肉周妻累此身同參幾輩各精勤簡齋解讀傳鐙錄
魯直徒存發願文埽地焚香聊爾爾搬柴運水枉紛紛
楞嚴祇是家人語如是從誰證我聞

封胡羯末各馳譽南阮偏依北阮居已媿衰宗稱閥閱
空傳陰德大門閭生兒況有陶潛恨戒子曾無馬援書
莫笑阿奴恒碌碌能興絡秀倚關渠

晚晴雖好迫桑榆十里秋山尙蟪蛄斯世誰能忍終古
此身聊復緩須臾一錢不值傾城帽百刼難迴推背圖
拚與烟霞成錮疾沉冥坐待海波枯

五十生日書憤

簡齋如後山歿皆四十九吾年已過一朝聞夕可朽後
山屈卑官簡齋庶大受世論兩忘之但有詩挂口文人
具慧業豈藉爵與壽名德苟不昌期頤復何有我少無
宦情身未膺組綬亦不苦寒餓晚食足菰韭閉門偶索
句所得但覆瓿持此擬二陳百有一似否建炎歷紹興
天水痛解紐幸哉泥馬渡猶可畫江守簡齋赴行在萬

里繭足走垂死覩中興歸臥未白首亂作十七年瓦裂
今已久吾曹無寸鐵熟視但縮手葬身當何所苟活良
自忸願留未抉目盡閱百態醜無聊託文字傳世殆亦
偶厭厭蝮與志名氏訝誰某西風昨夜寒霜氣入林藪
底用期後凋速化羨蒲柳

秋晚過海藏樓主人方遊日本未歸也

乘槎消息渺支機雲海沈沈又夕暉秋後花如人晚達
霜前葉似客將歸乞師志欲梨洲繼去國心甯舜水違
莫羨樓高能捧日羣陰高更刺天飛

著書易米圖爲陳墨逸作

往與海藏言極稱書院制謂昉安定胡宋元迨清季上
者設分科教學共講肄專門多名家畢生治一藝詁經
學海堂並峙嘉道際百輩出通儒半入題名記次亦裨
舉業鍾山紫陽類橫舍聚高材齋課月有試膏火三數
金寒士得卒歲承平作秀才此境彌有味國變科舉亡
弦誦亦遂廢橫行佞盧書盡奪倉沮位賊民倡滅古秦
火烈可畏誰能著儒冠枵腹但煮字墨侈治樸學寒餓
非所計亂世抱遺經士固各有志著書名山業易米良
可愼猶勝柴桑翁乞食不自諱使子生明時平流取科
第不然稽古榮祠祿亦易致奈何伏窮海咕嗶遭世棄

徒習不驗言遠舍耒耜利炳燭吾未能追往增感喟高
義媿指困佳傳儻我賜

某人病起有詩作此答之

有家無食意蕭疏至竟幽憂疾未除起死重煩倉扁術
誤人悔讀計然書方垣到眼誰能洞木石爲腸我不如
聊緩須臾供煦沫殘年應共惜居諸

識字從知種禍胎更堪憂患迭相催雕鏤肝腎曾何得
煎燼香膏等可哀留世豹皮勞顧惜化身蟲臂費疑猜
脫君鬼手非無意待看滄塵第幾回

蘇堪先生歸自日本賦此奉訊

延平忠憤所南悲四十年中節再持關尹儻知周柱史
王人猶秉漢官儀東諸侯疊談經席後樂園增掌故詩
白髮青娥紅葉館相逢掩涕說龍旗

壽伯揆五十

崔盧門望各嫖姚窮海相憐煦沫消杜老秋風補茅屋
韋郎日暮踏斜橋佛參法喜曾何恨國有文宗已不祧
莫向齊年評祿命從渠一鶚獨凌霄

伯揆居
斜橋路

豳風堂上舊園官故國平居感歲寒親在敢云身漸老
巢傾差幸卯能完童牛角馬觀生幻雪竹霜筠捨宅難
一代才名論華管他年史筆未容寬



